

諸葛忠武侯又集

武侯集

諸葛忠武侯文集卷一

茶陵譚福壽堂校槧

草廬對

自董卓已來豪傑並起跨州連郡者不可勝數曹操
比於袁紹則名微而眾寡然操遂能克紹以弱爲彊
者非惟天命抑亦人謀也今操已擁百萬之眾挾天
子以令諸侯此誠不可與爭雄孫權據有江東已歷
三世國險而民附賢能爲之用此可以爲援而不可
圖也荊州北據漢沔利盡東海東連吳會西通巴蜀

此用武之國而其主不能守此殆天所以資將軍將
軍豈有意乎益州險塞沃野千里天府之土高祖因
之以成帝業劉璋闇弱張魯在北民殷國富而不知
存恤智能之士思得明君將軍既帝室之胄信義著
於四海總攬英雄思賢如渴若跨有荆益保其巖阻
西和諸戎南撫夷越外結好孫權內修政理天下有
變則命一上將將荊州之軍以向宛洛將軍身率益
州之眾以出秦川百姓孰敢不箪食壺漿以迎將軍
者乎誠如是則霸業可成漢室可興矣

爲先帝與後帝遺詔

朕初疾但下痢耳後轉雜他病殆不自濟人五十不
稱天年已六十有餘何所復恨但以卿兄弟爲念射
君到說丞相歎卿智量大增修過於所望審能如此
吾復何憂勉之勉之勿以善小而不爲勿以惡小而
爲之惟賢惟德可以服人汝父德薄勿效之可讀漢
書禮記閒暇厯觀諸子及六韜商君書益人意智聞
丞相爲寫申韓管子六韜一通已畢未送道亡可自
更求聞達

又詔

吾亡之後汝兄弟父事丞相令卿與丞相共事而已

爲後帝伐魏詔

朕聞天地之道福仁而旤淫善積者昌惡積者喪古今常數也是以湯武修德而王桀紂極暴而亡曩者漢祚中微網漏凶慝董卓造難震盪京畿曹操階旤竊執天衡殘剝海內懷無君之心子丕孤豎敢尋亂階盜據神器更姓改物世濟其凶當此之時皇極幽昧天下無主則我帝命隕越於下昭烈皇帝體明叡

之德光演文武應乾坤之運出身平難經營四方人
鬼同謀百姓與能兆民欣戴奉順符讖建位易號不
承天序補弊興衰存復祖業誕膺皇綱不墜於地萬
國未靜早世遐殂朕以幼沖繼統鴻基未習保傳之
訓而嬰祖宗之重六合壅否社稷不建永惟所以念
在匡救光載前緒未有攸濟朕甚懼焉是以夙興夜
寐不敢自逸每從菲薄以益國用勸分務穡以阜民
財授才任能以參其聽斷私降意以養將士欲奮劍
長驅指討凶逆朱旗未舉而不復隕喪斯所謂不然

我薪而自焚也殘類餘醜又支天旽恣睢河洛阻兵
未弭諸葛丞相弘毅忠壯忘身憂國先帝託以天下
以勗朕躬今授之以旄鉞之重付之以專命之權統
領步騎二十萬眾董督元戎恭行天伐除患甯亂克
復舊都在此行也昔項籍總一彊眾跨州兼土所務
者大然卒敗垓下死於東城宗族如焚爲笑千載皆
不以義陵上虐下故也今賊效尤天人所怨奉時宜
速庶憑炎精祖宗威靈相助之福所向必克吳王孫
權同恤災患潛軍合謀犄角其後涼州諸國王各遣

月支康居胡侯支當康植等二十餘人詣受節度大
軍北出便欲率將兵馬奮戈先驅天命旣集人事又
至師貞勢并必無敵矣夫王者之兵有征無戰尊而
且義莫敢抗也故鳴條之役軍不血刃牧野之師商
人倒戈今旡麾首路其所經至亦不欲窮兵極武有
能棄邪從正簞食壺漿以迎王師者國有常典封寵
大小各有品限及魏之宗族支葉中外有能規利害
審順逆之數來詣降者皆原除之昔輔果絕親於智
氏而蒙全宗之福微子去殷項伯歸漢皆受茅土之

慶此前世之明驗也若其迷沈不返將助亂人不式
王命戮其妻孥罔有攸赦廣宣恩威貸其元帥弔其
殘民他如詔書律令丞相其露布天下稱朕意焉

南征詔

裴松之蜀志注詔
賜云云事在亮集

賜丞相亮金鈇鉞一具曲蓋一前後羽葆鼓吹一部
虎賁六十人

請宣大行皇帝遺詔表

伏惟大行皇帝邁仁樹德覆燾無疆昊天不弔寢疾
彌留今月二十四日奄忽升遐臣妾號咷若喪考妣

乃顧遺詔事惟太宗動容損益百寮發哀滿三日除服到葬期後如禮其郡國太守相都尉縣令長三日便除服臣亮親受勅戒震畏神靈不敢有違臣請宣下奉行

前出師表

臣亮言先帝創業未半而中道崩殂今天下三分益州疲敝此誠危急存亡之秋也然侍衛之臣不懈於內忠志之士忘身於外者蓋追先帝之殊遇欲報之於陛下也誠宜開張聖聽以光先帝遺德恢弘志士

之氣不宜妄自菲薄引喻失義以塞忠諫之路也官
中府中俱爲一體陟罰臧否不宜異同若有作姦犯
科及爲忠善者宜付有司論其刑賞以昭陛下平明
之治不宜偏私使內外異法也侍中侍郎郭攸之費
禕董允等此皆良實志慮忠純是以先帝簡拔以遺
陛下愚以爲宮中之事事無大小悉以咨之然後施
行必能裨補闕漏有所廣益也將軍向寵性行淑均
曉暢軍事試用於昔日先帝稱之曰能是以眾議舉
寵以爲督愚以爲營中之事事無大小悉以咨之必

能使行陳和穆優劣得所也親賢臣遠小人此先漢
所以興隆也親小人遠賢臣此後漢所以傾覆也先
帝在時每與臣論此事未嘗不歎息痛恨於桓靈也
侍中尙書長史參軍此悉貞亮死節之臣也願陛下
親之信之則漢室之隆可指日而待也臣本布衣躬
耕南陽苟全性命於亂世不求聞達於諸侯先帝不
以臣卑鄙猥自枉屈三顧臣於草廬之中咨臣以當
世之事由是感激遂許先帝以馳驅後值傾覆受任
於敗軍之際奉命於危難之間邇來二十有一年矣

先帝知臣謹慎故臨崩寄臣以大事也受命以來夙
夜憂懼常恐付託不效以傷先帝之明故五月渡瀘
深入不毛今南方已定甲兵已足當獎率三軍北定
中原庶竭駑鈍攘除姦兇興復漢室還於舊都此臣
所以報先帝而忠陛下之職分也至於斟酌損益進
盡忠言則攸之禕允之任也願陛下託臣以討賊興
復之效不效則治臣之罪以告先帝之靈若無興德
之言則戮允等以章其慢陛下亦宜自謀以諮諏善
道察納雅言深追先帝遺詔臣不勝受恩感激今當

遠離臨表涕泣不知所云

後出師表

先帝慮漢賊不兩立王業不偏安故託臣以討賊也
以先帝之明量臣之才故知臣伐賊才弱敵彊也然
不伐賊王業亦亡惟坐而待亡孰與伐之是故託臣
而弗疑也臣受命之日寢不安席食不甘味思惟北
征宜先入南故五月渡瀘深入不毛并日而食臣非
不自惜也顧王業不可偏安於蜀都故冒危難以奉
先帝之遺意也而議者謂爲非計今賊適疲於西又

務於東兵法乘勢此進趨之時也謹陳其事如左高
帝明並日月謀臣淵深然涉險被創危然後安今陛
下未及高帝謀臣不及良平而欲以長計取勝坐定
天下此臣之未解一也劉繇王朗各據州郡論安言
計舉引聖人羣疑滿腹眾難塞胸今歲不戰明年不
征使孫策坐大遂并江東此臣之未解二也曹操智
計殊絕於人其用兵也髣髴孫吳然困於南陽險於
烏巢危於祁連偏於黎陽幾敗北山殆死潼關然後
僞定一時耳况臣才弱而欲以不危而定之此臣之

未解三也曹操五攻昌霸不下四越巢湖不成任用
李服而李服圖之委任夏侯而夏侯敗亡先帝每稱
操爲能猶有此失況臣駑下何能必勝此臣之未解
四也自臣到漢中中間基年耳然喪趙雲陽羣馬玉
閭芝丁立白壽劉邵鄧銅等及曲長屯將七十餘人
突將無前賓叟青羌散騎武騎一千餘人此皆數十
年之內所糾合四方之精銳非一州之所有若復數
年則損三分之二也當何以圖敵此臣之未解五也
今民窮兵疲而事不可息事不可息則駐與行勞費

正等而不及今圖之欲以一州之地與賊持久此臣
之未解六也夫難平者事也昔先帝敗軍於楚當此
之時曹操拊手謂天下已定然後先帝東連吳越西
取巴蜀舉兵北征夏侯授首此操之失計而漢事將
成也然後吳更違盟關羽毀敗秭歸蹉跌曹丕稱帝
凡事如此難可逆見臣鞠躬盡力死而後已至於成
敗利鈍非臣之明所能逆覩也

此表亮集所無
出張儼默記

薦呂凱表

永昌郡吏呂凱府丞王伉等執忠絕域十有餘年雍